



№69 (10059)
30 тамыз,
жұма
2024 жыл

Жалағаш жаршысы


Аудандық қоғамдық-саяси газет

Газет 1934 жылдың 10 қаңтарынан бастап шығады



«zhalaqash-zharshysy.kz»
ақпараттық агенттігі

Бүгін – Конституция күні!



Құттықтау

Құрметті аудан тұрғындары!

Сіздерді Қазақстан Республикасының Конституциясы күнімен шын жүректен құттықтаймын!

Қастерлі Ата Заңымыз – тәуелсіздігіміздің тірегі, табысты дамуымыздың кепілі. Ол бейбітшілік пен берекелі өмірдің, заңның үстемдігі мен әділеттіліктің тұғыры болып саналады.

Егемен еліміздің өсуі мен қалыптасу жылдары ізденіс пен жетістік кезеңі болғаны баршаңызға мәлім. Конституция осы уақыт ішінде талай белестерді бағындырған мемлекетіміз бен қоғамымыздың одан әрі дамуының ұйытқысы болды. Бүгінде уақыт сынынан сүрінбей өткен еліміз дүниежүзілік қоғамдастықта лайықты орнын алып отыр.

Бүгінде Мемлекет басшысы Қасым-Жомарт Кемелұлы Тоқаевтың басамасымен тәуелсіз еліміз жаңаша қадамға жол ашып келеді. Ата Заңның аясында халықтың әл-ауқатын арттыруда қарқынды жұмыстар қолға алынды. Конституция тәуелсіздігіміздің кепілі ретінде бірлігімізді бекемдеп, экономикамызды нығайтуда, әлеуметтің әлеуетін арттыруда берік тұтқаға айналды.

Біз жаңа мемлекеттік модельге, мемлекет пен қоғамның өзара іс-қимылының жаңа форматына көшіп, «Жаңа Қазақстанды» құру жолында үлкен қоғамдық келісімге, тәртіпке, бейбітшілікке және тыныштыққа жету мүмкін болмайды, яғни мұндай жағдайда Отанның ырыс-берекелі болашағы туралы айтудың да қажеті жоқ деп есептеймін.

Ата Заң әрқайсысымыз үшін Қазақстан халқының тату-тәтті ынтымағының нышаны, өңіріміздің, бүкіл еліміздің одан әрі тұрақты дамуы мен гүлденуінің берік іргетасы болып табылады. Ата Заңымызды ұлықтау – егемен еліміздің әрбір азаматының қасиетті борышы.

Қадірлі жалағаштықтар!

Бүкіл жарқын істеріміздің қайнар бастауына айналған Конституция күнімен құттықтай отырып, сіздерге зор денсаулық, отбасыларыңызға береке, Отанымыздың дамуы мен гүлденуі жолындағы қажырлы еңбектеріңізге жеміс тілеймін!

Тәуелсіздігіміз тұғырлы, еліміз еңселі, бірлігіміз бекем болсын!

Құрметпен, Ардақ ИБРАИМОВ
Жалағаш ауданының әкімі

Құттықтау

Қадірлі жалағаштықтар, ардақты аудан жұрты!

Сіздерді Қазақстан Республикасының Конституциясы күнімен шын жүректен құттықтаймын!

Қастерлі Ата Заңымыз – тәуелсіздігіміздің тірегі, табысты дамуымыздың кепілі. Ол бейбітшілік пен берекелі өмірдің, заңның үстемдігі мен әділеттіліктің тұғыры болып саналады.

Егемен еліміздің өсуі мен қалыптасу жылдары ізденіс пен жетістік кезеңі болғаны баршаңызға мәлім. Конституция осы уақыт ішінде талай белесті бағындырған мемлекетіміз бен қоғамымыздың одан әрі дамуының ұйытқысы болды. Бүгінде уақыт сынынан сүрінбей өткен Қазақстан Республикасы дүниежүзілік қоғамдастықта лайықты орнын алып отыр.

Ата Заңның арқасында Тәуелсіз еліміз қаншама жылда толайым табыстарға қол жеткізді. Сол уақыттан бері Ата Заңымыз бен ата дәстүрімізді жалғастырып келе жатырмыз. Есім ханның ескі жолы, Қасым ханның қасқа жолы, Тәуке ханның Жеті жарғысынан бастау алатын Ата Заң XXI ғасырдың шақыруларына лайықты жауап беретін басты құжатымызға айналды.

Республикамыз Конституцияның өзекті ережелеріне сүйене отырып, Қазақстан Республикасының Президенті Қасым-Жомарт Тоқаевтың сындарлы саясатымен ел тағдыры үшін өмірлік маңызы бар жаңарулар жүргізілді. Бүгінгі күні Мемлекет басшысы Қасым-Жомарт Кемелұлы Тоқаевтың басамасымен тәуелсіз еліміз жаңаша қадамға жол ашып келеді. Ата Заңның аясында халықтың әл-ауқатын арттыруда қарқынды жұмыстар қолға алынды. Конституция тәуелсіздігіміздің кепілі ретінде бірлігімізді бекемдеп, экономикамызды нығайтуда, әлеуметтің әлеуетін арттыруда берік тұтқаға айналды.

Қадірлі жалағаштықтар!

Сіздерді еліміздің ұлық мерекесімен құттықтай отырып, баршаның дамуына амандық, береке, бірлік тілеймін. Тәуелсіздігіміз тұғырлы, еліміз еңселі, бірлігіміз бекем болғай!

Құрметпен, Жалағаш аудандық мәслихатының төрағасы Өмірзақ ЕЛЕУСІНОВ

Тәуелсіздік тірегі – Ата Заң

Мәңгілік елдің бағына орнаған тәуелсіздіктен кейін өмірге келген айбынды Ата Заңымыз қарақтың рухын көтеріп, дамудың даңғыл жолына бастап барады. Адамзаттың абыройы мен мерейін көтеруге негізделген заңның баптары мен тармақтары тек қазақ ұлтының ғана емес, біздің елде бейбіт өмір сүріп жатқан өзге ұлттар мен ұлыстардың да құқығын қорғап, бауырмалдық сипатта жазылып жарық көруі үлкен адамгершілік, татулық, жанашырлық принципін көздейді. Тұғыры биік, ғұмыры ұзақ заңымыздың беделі жыл санап көтеріліп, елдің игілігіне қызмет жасауда. Мұның бәрі еркіндіктің ақбоз атының кен дала атамекенде кесіліп шауып, азаттықтың көк туын еркін самғатып, Ұлы дала төскейінде кең тыныстаған жылдар шоғырының жемісті қолтаңбасы сынды.

Азат елдің айбынына айналған Конституция – тәуелсіздігіміздің ең басты құжаты және халықтың өркін өмір сүруінің, білім алуының, азат елдің айбынды тұлғасы болудың толыққанды кепілі. Қай дәуірде, қай қоғамда болсын, көз келген елдің пайда болуы мен мемлекеттің қалыптасуы, дегірлеп өрлеуі белгілі бір құқықтық жүйеге иек артып қалыптасатыны тарихтан белгілі.

Қазіргі Қазақстан мемлекетінің Ата Заңы – ғасырлар бойы қалыптасқан адамзат баласының жалпы құндылықтары, ата-бабаларымыздың ар-ожданы мен биік парасатынан тұратын бірлік, тыныштық идеясын өз бойына сіңірген өлемдегі ең жас Конституциялардың бірі. Солай бола тұрса да, еліміздің Конституциясы өлемдегі ең үздік 50 Конституцияның бірі болып саналатыны – тәуелсіздіктің 3 онжылдықтың белесін бағындырған Қазақстан үшін зор мақтанш, үлкен абырой.

Қазақ даласында қалыптасқан мемлекеттік пен құқықтық дәстүр тамыры тереңде. Әлемге әйгілі Күлтөген ескерткішіне «Әлемнің көгінде аспан төменінде қоңыр жер пайда болғанда,

осы екеуінің арасында адам баласы жаратылды. Адамзат баласының үстінен менің бабаларым Бұмын қаған мен Истемі қаған билік жүргізді. Таққа отырған олар өз мемлекетін қорғап, түркі заңдарын шығарып, оны бекітті» делінген.

Ұлылық пен даналық дарыған қазақ халқының мыңдаған жыл бойы өзіндік әдет-ғұрыптары мен дала заңдары болған Ол заңның ерекшелігі шешендік, тапқырлық, айтқыштық өнерді өздеріне темірқазық еткен. Қара қылды қақ жарған өділ билердің өзін де, сөзін де қадір тұтып, олардың есімін ауыз әдебиеті үлгісімен тарихқа таңбалаған.

Түркі бабаларымыздан бастау алған заң түзу қызметі, қазақ хандығы дәуірінде Қасым ханның, Есім ханның және Тәуке ханның тұсында өз жалғасын тапты. «Қасым ханның қасқа жолы» деп аталған көшпенді заң жинағы өмірге келді. Оның негізгі мазмұны Қасым ханның жүргізген мемлекеттік саясатына негізделген. Ал «Есім ханның ескі жолы» заңдар жинағы сол дәуірдегі мемлекеттік басқару жүйесін реттеуге бағытталған.

Қазақ халқының өміріндегі ереже-қағидалардың, салт-дәстүрлердің жүйелі жиынтығы атақты «Жеті жарғы» еді. «Жеті Жарғы» бабаларымыздың жан-жақты байырталған құқықтық мұрасы болды.

– 1995 жылы қазіргі Ата Заңымыз қабылданды. Бұл қадам тереңнен тамыр тартатын мемлекеттімізді тың өріске бастап, Қазақстан Республикасының күрделі геосаяси жағдайдағы дамуының даңғыл жолын айқындады. Конституциямызда белгіленген адам құқығы мен бостандығы, саяси және әлеуметтік-экономикалық құрылым қағидалары әділетті қоғам мен қуатты мемлекеттің айнымас тұғырына айналды. Халық билігі, теңдік, бірлік, заң үстемдігі қастерлі ұстанымдар ретінде қалыптасып, Қазақстанның келешектегі жан-жақты даму бағдарының мазмұнын айшықтай түсті. Ата заңымыз уақыт рухына және азаматтарымыздың талап-тілегіне сай келеді. Сондай-ақ оның жасампаздық әлеуеті саяси жүйе мен әлеуметтік-экономикалық қатынастарды одан әрі жетілдіруге бағытталған. Біз мемлекеттің берік конституциялық негізіне

сүйене отырып, елдегі келісім мен саяси тұрақтылықты сақтаймыз және азаматтық қоғаммен сындарлы байланысты жалғастыра береміз, – деді Мемлекет басшысы Қасым-Жомарт Тоқаев.

Тарихқа жүгінсек, 1995 жылы 30 тамызда – жалпыхалықтық референдумға сайлаушылардың 90,58 пайызы қатысып, олардың 89,14 пайызы жаңа Конституцияны қолдады. Бұл тәуелсіздік тарихында тұңғыш рет бүкілхалықтық талқылауға салынып, елдің пікірі ескерілген халықтық Конституция болды.

Конституцияда Қазақстан Республикасы демократиялық, зайырлы, құқықтық және әлеуметтік мемлекет екені, мемлекеттің ең жоғары құндылығы адам және оның өмірі, құқықтары мен бостандықтары екені көрсетілген. Биліктің бірден-бір бастауы халық болып танылды.

Осылайша 1995 жылғы Конституция Қазақстанның қазіргі мемлекеттілігінің негізін салды. Бүгінде Конституциямыз еліміздің қоғамдық-саяси және әлеуметтік-экономикалық дамуының негізіне айналды, заң үстемдігінің шынайы үлгісін көрсетіп отыр. Конституциялық нормаларды қатаң сақтай отырып, елімізде биліктің демократиялық принциптер негізінде алмасуы орын алды.

Конституция ел-халқының пікірін есепке ала отырып жасалған құқықтық-саяси құжатқа айналды. Конституцияны қалыптастыруға қалың жұрттың қатысуы Ата Заңның әлеуетін арттырды. Осы уақыт ішінде Қазақстанның Конституциясы уақыттың сынынан сүрінбей өтті. Сәйкесінде бұл құжат өзінің заман талабына лайықтылығын дәлелдеді.

Жандос ЖАЗКЕН

Салтанатты шара

Ата Заң – алтын діңгегім

Конституция күні – халқымыз үшін ең қастерлі, ең ұлық мереке.

Мемлекетіміздің құқықтық негізін айқындаған Ата заңымыздың қабылданғанына биыл – 29 жыл. Ата Заңымыз ардақталар мемлекеттік мереке қарсаңында Қонысбек Қазантаев атындағы аудандық мәдениет үйінде «Ата Заңым – алтын діңгегім» атты салтанатты жиын өтті.

Салтанатты шара Тәуке ханның «Қасым ханның қасқа жолы мен Есім ханның ескі жолы» негізге ала отырып, қазақ елінің бас көтерген би-ешендерінің жаңа заңдар жиынтығын құру үшін Күлтөбенің басына жиып, «Эз Тәукеңің жеті жарғысы» деген атауға ие болған Заңдар жиынтығының өмірге келуіне арналған қойылыммен бастау алды. Аудан әкімі Ардақ Ибраимов жалағаштықтарды Конституция күнімен құттықтап, Ата Заңымыздың беделі мен маңызына тоқталды. – Осыдан 29 жыл бұрын миллиондаған қазақстандық жаңа Конституцияның қабылдануы үшін жалпыхалықтың дауысқа салумен өзінің тарихи таңдауын жасаған болатын. Ата-бабаларымыз дала заңдарының білгірлері билеріміздің билігіне сөзсіз бағынған. Тарихтан тағылым алған бүгінгі буын да игі дәстүрді жалғап, ұрпақтар сабақтастығын үзген емес. Ата заңымыздың негізгі ережелері аясында еліміздің

тұрмыс-тіршілігі айтарлықтай өзгеріп, нарықтық экономика құрылып, демократиялық қоғамның негізі қаланды. Қазақстан халықаралық аренада оқ бойы озық шыққан елдер қатарынан лайықты орнын иеленді. Еліміздің басқа аймақтарымен қатар Сыр өңірі, оның ішінде Жалағаш ауданы да даму үстінде. Сіздерге мерейлі мереке қарсаңында баршаның да мықты денсаулық, амандық, молшылық, бақ-береке тілеймін. Тәуелсіздігіміздің тірегі, мемлекетіміздің жүрегі болған Ата Заңымыз мәңгілік болсын, – деді аудан әкімі. Ардақ Әбдіғалпарұлы ауданның өркендеуіне үлес қосып жүрген бірқатар сала қызметкерін арнайы облыс, аудан әкімінің алғы хаттарымен марапаттады. Шара аудан өнерпаздарының мерекелік концертіне ұласты.

Ақтоты БҮРКІТБАЙ



